

**ՀՀ ֆինանսների նախարարություն
Հարկային և մաքսային մարմինների գանգատարկման հանձնաժողով**

Ո Ր Ո Շ ՈՒ Մ 6/8

1 հուլիսի 2014 թ.

Քննարկվեց Ա/Ձ Նորայր Փաշայանի 04.06.2014 թ-ի դիմումով բերված գանգատը սոցիալական ապահովության վճարի գծով առաջադրված պարտավորության դեմ:

Ա/Ձ Նորայր Փաշայանի գանգատում բերված փաստարկները.

Աբովյանի ՏՀՏ կողմից Ա/Ձ Նորայր Փաշայանին հետ են վերադարձվել ապրիլ-հունիս և հուլիս-սեպտեմբեր եռամսյակների համար ներկայացված արտոնագրերը, պարունակության թերթիկների բացակայության պատճառաբանությամբ: Արդյունքում, այդ վեց ամիսների համար հաշվարկվել է սոցիալական վճար՝ գումարով 30.000 դրամ:

Ա/Ձ Նորայր Փաշայանը խնդրում է թույլ տալ ներկայացնել արտոնագրային վճարի հաշվետվությունները, սոցիալական վճարների գծով հաշվարկված պարտավորություններից ազատվելու նպատակով:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ֆինանսների նախարարության հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ Ա/Ձ Նորայր Փաշայանը պետական ռեսուրսներում հաշվառվել է 14.04.2012 թ-ին և ստացել է պետական գրանցման վկայական:

31.04.2012 թ-ին և 31.07.2012 թ-ին Ա/Ձ Նորայր Փաշայանի կողմից փոստային ծառայության միջոցով Կոտայքի ՏՀՏ է ուղարկվել համապատասխանաբար ապրիլ-հունիս և հուլիս-սեպտեմբեր ամիսների համար մարդատար մեքենայով ուղևորափոխադրում իրականացնելու նպատակով արտոնագրային վճար վճարող համարվելու համար դիմում-հայտարարություններ: Քանի որ, նշված դիմում-հայտարարությունները ներկայացվել են «Հարկերի մասին» ՀՀ օրենքի հավելված 3-ի 6-րդ կետի պահանջների խախտմամբ (բացակայել են պարունակության թերթիկները), ուստի դրանք փոստային ծառայության միջոցով ետ են վերադարձվել: Այնուհետև, 14.09.2012 թ-ին ներկայացվել են հուլիս-սեպտեմբեր ամիսների և 31.10.2012 թ-ին հոկտեմբեր-դեկտեմբեր ամիսների համար դիմում-հայտարարություններ՝ նշումով, որ Ա/Ձ Նորայր Փաշայանը հրաժարվում է սոցիալական ապահովության վճարները վճարելուց: Հետևապես, «Արտոնագրային վճարների մասին» ՀՀ օրենքի 7-րդ հոդվածի համաձայն, նվազագույն սոցիալական ապահովության վճարի 5000-ական դրամները հուլիս-սեպտեմբեր և հոկտեմբեր-դեկտեմբեր ամիսների համար չեն հաշվարկվել: Սակայն, ապրիլ-հունիս ամիսների համար «Պարտադիր սոցիալական ապահովագրության վճարների մասին» ՀՀ

օրենքի 5-րդ հոդվածի 5-րդ կետի համաձայն հաշվարկվել է նվազագույն սոցիալական վճար՝ ընդամենը 15.000 դրամ:

Վերոգրյալի կապակցությամբ հարկ է նշել, որ համաձայն «Արտոնագրային վճարների մասին» ՀՀ օրենքի Հավելված 8-ի 6-րդ կետի. «Հայտարարություն ներկայացնելու օրն անհատ ձեռնարկատերը կամ իրավաբանական անձը ստանում է արտոնագիր սույն հավելվածի N 2 ձևին համապատասխան: Ընդ որում, հայտարարությունը ներկայացնելու օրվա ընթացքում սույն հավելվածի N 2 ձևով արտոնագիր չտրամադրելու դեպքում արտոնագիրը համարվում է տրամադրված հայտարարությունը ներկայացնելու օրը, եթե անհատ ձեռնարկատերը կամ իրավաբանական անձը, սույն հավելվածի 16-րդ կետին համապատասխան, կատարել է արտոնագրային վճարի վճարում»:

Քննարկվող դեպքում Ա/Ձ Նորայր Փաշայանի կողմից փոստային ծառայության միջոցով Կոտայքի ՏՀՏ են ուղարկվել հաշվետու ժամանակաշրջանների համար մարդատար մեքենայով ուղևորափոխադրում իրականացնելու նպատակով արտոնագրային վճար վճարող համարվելու դիմում-հայտարարությունները, ինչպես նաև մինչև արտոնագրերի ստանալը վճարվել են արտոնագրային վճարի գումարները: Սակայն, պարունակության թերթիկների բացակայության պատճառով, դիմում-հայտարարությունները Կոտայքի ՏՀՏ կողմից փոստային ծառայության միջոցով ետ են վերադարձվել:

Հարկ է նշել, որ «Վարչարարության հիմունքների և վարչական վարույթի մասին» ՀՀ օրենքի 5-րդ հոդվածի համաձայն. «Վարչարարություն իրականացնելիս վարչական մարմիններին արգելվում է միայն ձևական պահանջների պահպանման նպատակով անձանց ծանրաբեռնել պարտականություններով կամ մերժել նրանց որևէ իրավունք տրամադրելը, եթե նրանց վրա դրված պարտականությունները բովանդակային առումով կատարված են»:

Հանձնաժողովը գտնում է, որ տվյալ դեպքում գործ ունենք մի իրավիճակի հետ, երբ «Արտոնագրային վճարների մասին» ՀՀ օրենքով նախատեսված արտոնագիր ստանալու ընթացակարգը Ա/Ձ Նորայր Փաշայանի կողմից, ըստ էության, պահպանվել է: Այսինքն, «Արտոնագրային վճարների մասին» ՀՀ օրենքով Ա/Ձ Նորայր Փաշայանի վրա դրված պարտականությունները բովանդակային առումով վերջինիս կողմից կատարված են:

Հաշվի առնելով վերոգրյալը՝ Հանձնաժողովը գտնում է, որ Ա/Ձ Նորայր Փաշայանի գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Չ Ու մ է՝

Ա/Ձ Նորայր Փաշայանի 04.06.2014 թ-ի դիմումով բերված գանգատը բավարարել:

Հանձնաժողովի նախագահ



Վ.ՄԻՐՈՒՄՅԱՆ